

# SUHANO PAULUS SO UMATI WE KOLOSE

## Kaatono Wamba

Kolose se'onu kota mohobu we kadieno Asia (Turki ampa aitu), humanda timbuno kota Efesus. Kolabhi haa ta'u Paulus neate we kotano Efesus nefolele Bhihita Metaa (Tul 19:10). Suano wutono Paulus meowano Bhihita Metaa we kotano Kolose ini, tamaka mie marasaeano mai'aono we Efesus, nopesua dua Epafras (1:7-8).

Nopalusi seta'u haa ta'u, nebuhiandamo suha. Wakutuu ana'a wutono dotohongkuemo hampano folele'ano Bhihita Metaa. Nonamisi lalono nofaraluu dua natumangahida, kapa'amo nofetingkemo, ne olotando umati we Kolose nandoo guru-guru fofoguhu'aono kafoina'u umala. Nefoina'u'aondo, miendo sarani tabeano dasumombai kuasa te lani, peda ka'ibahatino mala'ekati, bhe tabeano daesuna bhe damangkafi atorano miendo Yahudi. Dadi'anomo weo suha ne umati we Kolose ini, Paulus nofohatoanda kafoina'u sakotu'uno so neangkafindo mie marasaeano ne Kristus. Puuno sepali'a kafoina'uno putae mpahinomo Kristus meowano kasalamati so manusia, sabhaha kafoguhu sumempa naeowa kaowu kakolilinono totono lalo.

---

## Kalengkano suha

1:1-2

**1** Suha aini nomai'ao ne idi, Paulus, rasuluno Kristus Yesus hampano kapoindalono Lahata'ala, bhe Timotius bhahitientoomu. <sup>2</sup>Apakatue so hintimiu bhahitie'iku, umati mongkilono Lahata'ala we Kolose, motangkano kaparasaea ne Kristus. Sio-siomo kabarakati bhe katohopono dadi mai'ao ne Lahata'ala Amantoomu sadhia napobhaiangkoomu.

## Sambahea bhe katumpuno lalo

1:3-14

<sup>3-4</sup>Tafetingkeemo kaparasaeamiu ne Kristus Yesus bhe kanini kaasimiu ne kosasawindo umatino Lahata'ala. Dadi'anomo taenomo tasambahea'angkoomu, sadhia taefoampe katumpuno lalo ne

Lahata'ala, Amano Ompuntoomu Yesus Kristus. <sup>5</sup>Katangka'anomo kaparasaeamiu na'a bhe kanini kaasimiu ne mie bhaimiu, hampano kaposahuna'ao umawaomu nefontaa-ntaano Lahata'ala te surugaa. Kaposahuna'ao ini ingka tokamo fetingkee'omu wakutuu-no dofohatoangkoomu bhoasao banarano, ma'anano o Bhihita Metaa. <sup>6</sup>Bhihita Metaa ini ingka nohatokoomu dua. Ne koseka'ewa'ae dhunia sadhulu ka'ewa nolele bhe sadhulu kabhahi hasilino ma'anano sadhulu kabhahi mie marasaeano ne Kristus bhe notibhalii podiundo. Pedamo dua ana'a ne hintimiu, notanda oleo kabhao-bhaono fetingkeomu bhe kotu-kotu'u pande'ao'omu kanini kaasino Lahata'ala. <sup>7</sup>Bhahi-bhahi'ae na'a ingka pande'aanemoomu mai'ao ne Epafras, bhahitie mani timoasi'aono, sabhangka mani weo kahadhaano Ompu. Anoa ini nokampuu-mpuu weo ka'ondofao ne Kristus so hintimiu. <sup>8</sup>Anoamo dua mohato kainsami, ingka poma-moasi'ao'omu weo kuasano Rohino Lahata'ala.

<sup>9</sup>Dadi'anomo notanda tafetingke peda na'a, miina bhe fengaasia tasambahea'angkoomu. Taesalo sio-siomo Rohino Lahata'ala nama'angkoomu timbangi bhe poma'ana metaa, neanomo lumosangie'omu mpuu kapoindalono Lahata'ala. <sup>10</sup>Ane nada na'a, dadi-miu namantasimo peda mie mangkafino Ompu bhe meka'iano lalono Lahata'ala. Kobhakeomu weo habu metaamiu, sampe sedhulu'a dua mande'ao'omu Lahata'ala. <sup>11</sup>Sio-siomo kuasano kumalabhiano Lahata'ala namekamatangkakoomu, so kosabaha'ao'omu bhe natumuhu lalomiu potaami'ao'omu sabhaha netompaloimiu. <sup>12</sup>Sadhia dua naowula lalomiu mefoampeomu katumpuno lalo ne Amantoomu. Anoamo mekapantasikoomu umawaomu dawu nefontaa-ntaa so umatino mongkilono weo kafopahinta'ano mentalea'ano. <sup>13</sup>Lahata'ala nofosalamati kaita mai'ao weo kuasano kahohondo maka nofogampi kaita weo kafopahinta'ano Anano kamoasi'aono. <sup>14</sup>Noangka ne Anano, nofobebasi kaitaomu, ma'anano dhosantoomu noti'amponimo.

### Sifati bhe kahadhaano Kristus

1:15-23

<sup>15</sup>Lahata'ala miina natiwohaa, tamaka Kristus ulanomo Lahata'ala tiwoha'ano. Anoamo kabhao-bhaono, koatenno nofoliuda bhahi-bhahi'ae nefokonandoono Lahata'ala. <sup>16</sup>Kapa'amo bhahibhahi'ae nefokonandoono Lahata'ala noangka ne Kristus. Sabhaha

ndumandoono te surugaa bhe we dhunia, tiwoha'ano bhe pata tiwoha'ano, sabhaha rohi mintahano kuasa, sabhaha neangkando rohi, saneamo nofokonandooda Lahata'ala noangka ne Kristus bhe nofokonandooda somo dua wutono Kristus. <sup>17</sup>Anoa nonandoomo wawo bhe sabhaha ndumandoo'ano; hampano kuasano Anoa bhahi-bhahi'ae ndumandoo'ano pae naohungga, sadaa-daa kae-ate'ando. <sup>18</sup>Anoamo mefotu'aono mbadha, ma'anano umati marasaeano. Anoamo kabhao-bhaono manuno mai'ao ne mate, neanomo nofewawomo ne bhahi-bhahi'ae ndumandoono. <sup>19</sup>Kapa'amo nopoulosahataa bhe kapoindalono Lahata'ala, bhahi-bhahi'ae sifatino Lahata'ala nosangka dua ne Kristus Anano. <sup>20</sup>Patudhuno Lahata'ala, noangka ne Anano ini, sabhaha ndumandoono te surugaa bhe we dhunia napometaa'anda bhe Wutono. Tuhuno heano Kristus te sau salipu meowanomo pometaa'a na'a.

<sup>21</sup>Hintimiu dua endefi'ini nokodo'o bhe Lahata'ala bhe poewangi-neomu hampano fekihi bhe habu modaimiu. <sup>22</sup>Tamaka ampa aitu hampano mateno Anano peda seemie manusia, Lahata'ala nopometaa'angkomoomu. Nadamo ana'a Kristus namowakoomu ne wiseno Lahata'ala, naongkilo bhe namoinda totono lalomiu, paemo kodengo-dengoomua. <sup>23</sup>Tamaka tabeano mpuu-mpuunie'omu kaparasaeamiu, fekamatangkae kofindamiu. Koise nomagoea'a, koise dua nogampi posahuna'ao ne'awamiu wakutuuno fetingkeomu Bhihita Metaa. Bhihita Metaa ainimo nefolele ne sabhaha manusia we towawano lani ini. Idimo dua ini, Paulus, katudu mefoleleno Bhihita Metaa na'a.

### **Ka'ondofao bhe kakadee-deeno Paulus**

**1:24-2:5**

<sup>24</sup>Aitu nowula laloku akadee-dee so hintimiu. Kapa'amo weo kakadee-deeno mbadhaku ini, ingka afopansuhu kakadee-dee nenanamisino Kristus mbali mbadhano, ma'anano umati marasaeano. <sup>25</sup>Lahata'ala nowa'a kanau taka aembali umondofaono umatino, amebhihitaiangkoomu bhoasaono Lahata'ala amopada-padae. <sup>26</sup>Bhihita aini ntini mo'o-mo'ono ta'umo nofebunie Lahata'ala ne sabhaha sampu'a pomantulu-ntuluno, tamaka ampa aitu rahasia maitu nofohatoandaemo umatino. <sup>27</sup>Ne umatinomo ini, gaono Lahata'ala namotiwohae kabhalano kabarakatino bhe kakalabhihiano rahasia aitu so sabhaha bansano liwu te dhunia ini. Rahasia

ana'a peda aini: Kristus neate weo totono lalondo umatino, Anoamo puuno kaposahuna'aomiu so menamisi'ao'omu dua kakalabhiano Lahata'ala. <sup>28</sup>Kristusmo ini nefebhihitai'ao mani ne sabhaha mie. Kosasawindo taefe'ulaianda bhe tafoina'uanda mai'ao we totono lalo kotimbangino. Patudhu mani neanomo kosasawindo tamowada ne wiseno Lahata'ala peda mie motangkano dadi weo totono lalondo, hampano dose'ise bhe Kristus. <sup>29</sup>Somo amooli'ao ana'a, a'ulei'e laloku akahadhaa bhe apoewangi ampa ka'osano bukuku, hampano kuasano Kristus kumahadhaano weo totono laloku.

**2** Gaoku mpuu mande'aaneomu kabhieno apoewangi weo totono laloku so hintimiu bhe umati we Laodikia bhe kosasawindo mie tapa'o mohano ulaku. <sup>2</sup>Bhahi-bhahi'ae ini ahabue so naotangka'ao lalondo umati bhe dase'ise weo kanini kaasi. Ane nada na'a andoa dae'awa kabarakati bhalano, ma'anano kotu-kotu'u dalumosangie kabanara, paemo dapoibhahaanea. Damande'aane dua rahasiano Lahata'ala, ingka wutono Kristus. <sup>3</sup>Kapa'amo Kristusmo ini motiwohano kosasawi'ae timbangi bhe kapandeno Lahata'ala, tapedamo arataa tifebuni'ano endefi'ini, ampa aitu nentaleamo.

<sup>4</sup>Kanandoo'ano afohatokoomu peda aini keana dobhohe-bhohe'ikoomu mie mekameko-mekono wambano. <sup>5</sup>Kapa'amo mahingga mbadhaku nokodo'o bhe hintimiu, totono laloku nopobhaiangkoomu. Nowula sepali'a laloku awoha ka'osano kase'isemiu bhe kamatangano kaparasaeamiu ne Kristus.

### Dadi sumangkano weo Kristus

2:6-15

<sup>6</sup>Ingka tahimaemoomu Kristus Yesus nembali Ompumiu. Dadi'anomo podiumiu tabeano napoangkafi bhe kapoindalono, kapa'amo se'isemoomu bhe Kristus. <sup>7</sup>Kaparasaeamiu ne Anoa tabeano nakopahaka, bhe wutono Kristus naembalimo kaengkoha'ano dadimiu. Kaparasaeamiu tabeano dhulu kamatangka, noposahataa bhe kafoina'u netahimamiu. Totono lalomiu naka'ende-ende mefoampeomu katumpuno lalo.

<sup>8</sup>Posi'ondoomu, koise dofetandoangkoomu fahamuno agama tapa kofahalaa, ingka nefekakolilino kaowu totono lalondo mie. Fahamu medando na'a miina namai'ao ne Kristus, tamaka nomai'ao ne fekihindo manusia nepomantulu-ntulu'ao bhe nomai'ao dua ne rohi kumuasaino dhunia ini. <sup>9</sup>Kapa'amo bhahi-bhahi'ae

sifatino Lahata'ala nosangkamo ne wutono Kristus, neate ne mbadha kamanusiano. <sup>10</sup>Weo kase'isemiu bhe Anoa, dadimiu nosangkamo dua, kapa'amo Kristus mefotu'aonomo sabhaha rohi mahintano bhe kokuasano.

<sup>11</sup>Weo kase'isemiu bhe Kristus, hintimiu padamo dosunakoomu. Ampamo kaowu suano kasuna nekahadhaando limando manusia, tamaka kasuna nekahadhaano Kristus weo totono lalomiu, ma'anano noaliangkoomu kuasano dhosa we lalomiu. <sup>12</sup>Kapa'amo wakutuuno dokadiu saranikoomu, [membaliomu peda mie mate maka, dokobuhukoomu bhe Kristus. Weo kakadiu saranimo dua ana'a, hintimiu itu suli dofodadikoomu bhe Kristus, hampano parasea'omu ne kuasano Lahata'ala toka mowanuno Kristus mai'ao ne mate. <sup>13</sup>Hintimiu endefi'ini momateomu hampano sabhaha ka'alamiu pakade mbadhamiu miina natisunaa. Tamaka ampa aitu Lahata'ala nofodadikomoomu poowa-owaomu bhe Kristus. Lahata'ala no'amponiemo sabhaha ka'alantoomu. <sup>14</sup>Hampano miina damangkafiomu pahintano Lahata'ala, nandoo fomobhie'aono bhe fonanti'aono, tapedamo buhino dosa. Gaha'a bhahi-bhahi'ae na'a nofosaliemo Lahata'ala, kanggetumo o suha ana'a nokantai'emo te sau salipu sampe sabhaha nemobhie'ao nowolomo. <sup>15</sup>Mai'ao te sau salipu Kristus notalodamo sabhaha rohi mahintano bhe kokuasano. Kafotalono Kristus dowohae sabhaha mie; rohi mahintano bhe kokuasano na'a kanggetumo katohongku dotapuda weo hamehameno kafotalono Kristus.

### Dae'ondofi ndumandoo'ano te surugaa

2:16-3:4

<sup>16</sup>Dadi'anomo koise undaomua mie bhaimiu damo'alakoomu hampano nehumaa bhe nefoho'umiu. Koemo dua damosuhukoomu meangkafiomu oleo hohaea'ano agama tawa hohaea'ano wula mohangku bhaha'i oleono Sabat. <sup>17</sup>Kosasawi'ae na'a saneamo ondulano kumadhadhia'ano mada kaowu, gaha'a nokadhadhiamu noko'ulamo ne wutono Kristus. <sup>18</sup>Koe sampe damekahugikoomu mie woha'ano kaowu dofekapanda wutondo bhe desombai mala'ekati. Mie andoa ini dofekalangeke diundo, mahinggamo miina bhe tingkuno, dofekihi kanandoono dhunia bhe dosangkesangke wutondo hampano dokopowoha. <sup>19</sup>Tamaka andoa miinamo damasande ne Kristus fofefotu'aono. Gaha'aitumo hampano nofefotuane Kristus, o mbadha [ma'anano umati marasaeano,

nodadi metaa kose'ulu-uluno, sabhaha katokano mbadha nose'ise nopotudu-tudumiane noangkafi losuano. Pedamo ana'a o mbadha dhulu kabhala bhe kamatangka, noposahataa bhe patudhuno Lahata'ala.

<sup>20</sup>Ingka momatemoomu poowa bhe Kristus maka mobeba-simoomu mai'ao ne rohi kumuasaino dhunia ini. Noafa'ao dua gaha'a nandoo dadi'ao'omu peda mie nekuasaino dhunia ini? Noafa gaha'a ta'otuhumoomu ne sabhaha atorano dhunia? <sup>21</sup>Sandahano atora na'a ibahano: “Koise dampasi aini”, “koise fenami aitu”, “koise dingku aini.” <sup>22</sup>Bhahi-bhahi'ae atorano na'a nopulao'ao kaowu giu nepake so binasano, ingka miina nakofahalaa; saneamo atora bhe kafoina'u nehabundo manusia. <sup>23</sup>Andoa maitu dofofoina'u dasumombai mala'ekati,<sup>a</sup> damekapanda wuto bhe dasumikisaa mbadha. Kafoina'u maitu daanumo woha'ano nokesa, tamaka sakotu'uno miina nakofahalaa so damewanaki'ao nafusuundo manusia.

**3** Ingka dofowanukoomu mai'ao ne mate poowa bhe Kristus. Dadi'anomo ondofiomu ndumandoo'ano te surugaa. Ne itumo Kristus nengkoha ne suanano Lahata'ala. <sup>2</sup>Sadhia fekihiomu sabhaha ndumandoo'ano te surugaa, koise sadhia fekihiomu ndumandoo'ano we dhunia ini. <sup>3</sup>Kapa'amo momatemoomu maka dadi bu'oumiu notifebunimo poowa bhe Kristus weo kase'iseno bhe Lahata'ala. <sup>4</sup>Kristusmo ini kamai'ano dadintoomu; mada kaowu ane namotiwoha Wutono, hintimiu dua tetewei tiwohaomu bhe Anoa mesua'omu weo kakalabhiano.

### Dadi ngkodau bhe dadi bu'ou

3:5-17

<sup>5</sup>Dadi'anomo fekamatee'omu weo totono lalomiu sabhaha fekihino dhunia: podiu tampahasa bhe pokahaku, o nafusuu bhe kapoindalo modai bhe kakadau-dau, kapa'amo o kakadau-dau ini ingka nopototo bhe desombai barahala. <sup>6</sup>Kosasawi'ae itu saneamo meowano amahano Lahata'ala ne mie tapa meangkano. <sup>7</sup>Ingka endefi'ini hintimiu mehabuomu dua peda na'a, wakutuuno dadi-miu nandoo nokuasai'e kapoindalono dhunia.

<sup>8</sup>Tamaka ampa aitu ohoe'omu amaha, pamuhu bhe pomodai. Koise fo'umbu, koise dua pugau tampahasa ne mie bhaimu.

<sup>a</sup> 2:23 Dasumombai mala'ekati nembali dua doma'anakie: *doangkafi tubhono agama kahabuno wutondo.*

<sup>9</sup>Koemo popaha-pahai'omu, kapa'amo dadi ngkodau bhe sabhaha diuno padamo ohoe'omu. <sup>10</sup>Ampa aitu dowa'angkomoomu dadi bu'ou, hintimiu membalimoomu manusia bu'ou. Mokonandoono dadi bu'ou na'a nopahabu'ounikoomu kansuhu ampa sifatimiu napototo bhe Wutono. Patudhuno neanomo mande'aaneomu mpuu wutono Lahata'ala maitu. <sup>11</sup>Weo dadi bu'ou ini miinamo bhe po'ala'ano miendo Yahudi bhe suano miendo Yahudi, mie nesuna tawa tapa nesuna, mie koliwuno tawa bansano liwu pata ko'adhatino, o bhatua tawa mie bebasi. Tamaka nefosibhalando ampamo kaowu Kristus, hampano Kristus neate weo totono lalondo kosasawindo na'a.

<sup>12</sup>Hintimiu umatino Lahata'ala timoasi'aono, padamo nopilikoomu mbali fehebua'ano mongkilono. Dadi'anomo fotiwohae'omu kabhelano lalo bhe kataano lalomiu ne mie bhaimu, fekapandae diumu, fekamalu lalomu bhe kosabaha. <sup>13</sup>Posaba-sabahakiomu, ane pomoda-modai'omu lalo poma'a-ma'afu'ao'omu. Ompu ingka padamo no'amponikoomu, dadi pedamo dua na'a hintimiu tabeano poma'a-ma'afu'ao'omu. <sup>14</sup>Te wawono bhahi-bhahi'ae na'a pomoa-moasi'ao'omu, kapa'amo o kanini kaasi kanggetumo kawawe mosangkano kase'isendo umati. <sup>15</sup>Naetaa katohopono dadi mai'ao ne Kristus nakumuasai fekihimiu bhe totono lalomiu. Kapa'amo patudhuno katibhasi'amiu sembadha bhe Kristus ingka so menamisi'ao'omu katohopono dadi na'a. Koe molimpuomu mefoampeomu katumpuno lalo. <sup>16</sup>Naetaa bhoasaono Kristus bhe sabhaha kabarakatino nakumabhinti totono lalomiu, neanomo naembali pofoi-foina'u bhe potanga-tangahiomu mai'ao ne totono lalo kotimbang. Pudhiomu Lahata'ala, mepakeomu lagu mazmur ne Kitabino Daud, lagu-laguno kapudhi bhe lagu-lagu lumebeno. Melaguomu bhe mefoampeomu katumpuno lalo ne Lahata'ala. <sup>17</sup>O ae maka dua nehabu bhe nepugau'aomiu, habue'omu tawa pugauaneomu peda mantasi'ano so mie mangkafino Ompu Yesus. Habuomu bhahi-bhahi'ae na'a poowa mefoampeomu katumpuno lalo ne Lahata'ala Amantoomu hampano sabhaha nedhalangino Yesus so hintimiu.

**Pokai-kai'ando mie weo dadi bu'ou**

**3:18-4:1**

<sup>18</sup>Hintimiu membalino hobhine, tuhuomu ne mo'anemiu, kapa'amo pedamo na'a mantasi'ano so mie marasaeano ne Ompu.

<sup>19</sup>Hintimiu membalino mo'ane, moasianeomu hobhinemiu, koise no'osa lalomiu.

<sup>20</sup>Hintimiu membalino ana'i, sadhia meangkaomu ne kamu-ngkulamiu, kapa'amo podiu medano aitu meka'iano lalono Ompu.

<sup>21</sup>Hintimiu membalino ama, koise fekalea lalondo ana'imu sampe nasikuhu lalondo.

<sup>22</sup>Hintimiu membalino bhatua, sadhia meangkaomu ne kafeompu'amiu we dhunia ini. Koise meangkaomu ane do'ondo-ondokoomu kaowu, so tipudhi'ao'omu, tamaka meangkaomu mai'ao weo totono lalo mohelasi, hampano kafosibhalamiu ne Ompu. <sup>23</sup>O ae maka nehabumiu, kahadhaa'eomu weo kakampuu-mpuuno lalo kao-kaomo ne'ondofaomiu Ompu, suano manusia'a. <sup>24</sup>Ingka pande'aanemo mada kaowu metahimaomu ponambo mai'ao ne Ompu. Ponambomiu na'a o kadawu toka nefontaa-ntaano Ompu so umatino. Kapa'amo kafeompu'a sakotu'uno ne'ondofaomiu ingka wutono Kristus, hintimiu o bhatuano. <sup>25</sup>La'ae koka'alano, natumongku'ao wutono ka'alano, kapa'amo Ompu miina nae-pola-ala'ao manusia.

**4** Hintimiu membalino kafeompu'a, feka'adhili bhe fekalaa lalomu ne bhatuamiu, ingka pande'aaneomu bhe kafeompu'amiu dua te surugaa.

### Katangahi sigao'ano

4:2-6

<sup>2</sup>Mpuu-mpuunie'omu sambaheamiu, kodhagaomu weo sambaheamiu poowa mefoampeomu katumpuno lalo. <sup>3</sup>Sambahea kainsamiomu dua, sio-siomo Lahata'ala naelengka kainsami fointo tamolele bhihitano Kristus tifebuni'ano endefi'ini. Kapa'amo kati-tohongku'aku mba'inomo aefolele bhihitano Kristus ini. <sup>4</sup>Sambahe'omu so naembali'ao atumalesao bhihita aini mentalea-mentalea, peda mantasi'ano so nehabuku.

<sup>5</sup>Pedamo pokai'amiu bhe mie tapa marasaeano, dadi kotimbanjomu. Kotika bhe kasalawa, pake metaa'eomu. <sup>6</sup>Sabhaha nekowamba'aomiu tabeano naombaka dametingkee bhe natimohela'ao lalo. Ane dameenakoomu, tabeano mandeomu tumobhoosidaomu seemie-seemie.



**Kasongkono suha**  
4:7-18

<sup>7</sup>Tikikus namai namohatoangkoomu bhahi-bhahi'ae netompa-loiku we ini. Tikikus ini bhahitientoomu timoasi'aono bhe kumampuu-mpuuno lalo, sabhangka mani weo ka'ondofao ne Ompu. <sup>8</sup>Atudue we hintimiu, so mande'ao'omu ngkoha-ngkoha mani we ini bhahi kaowu natilawesi dua lalomiu. <sup>9</sup>Anoa napobhaiiane Onesimus saliwumiu. Anoa ini bhahitientoomu dua timoasi'aono bhe kumampuu-mpuuno lalo. Kohoduando damohatoangkoomu sabhaha kumadhadhia'ano we ini.

<sup>10</sup>Aristarkus titohongkuno bhe idi nopakatuangkoomu dua salam. Pedamo dua aitu Markus pisano Barnabas. (Ingka padamo defebhitaiangkoomu, ane nahumato we itu tahima metaa'eomu.)

<sup>11</sup>Kapakatuno dua salam mai'ao ne Yesus nekonando dua Yustus. Kabhahindo miendo Yahudi marasaeano ne Ompu Yesus, ampamo andoa totoluno pobhai kanau takahadhaa so Kafopahinta'ano Lahata'ala. Andoa ini dolawesi mpuu laloku.

<sup>12</sup>Saliwumiu Epafras nepakatuangkoomu dua salam. Anoa ini palima-limano Kristus Yesus, sadhia dua nosambahea'angkoomu sampuu-mpuuno lalono. Nesalo ne Lahata'ala so naotangka'ao ko-findamiu weo kaparasaeamiu, membaliomu miendo sarani motangkano dadi tapa poibhahano, mie mangkafino kapoindalono Lahata'ala. <sup>13</sup>Awoha'ao wuntano matak, anoa ini no'u lei'e lalono nokahadhaa so hintimiu bhe so miendo Laodikia bhe miendo Hierapolis. <sup>14</sup>Lukas o doktere timoasi'aono bhe Demas dopakatuangkoomu dua salam.

<sup>15</sup>Fosampeomu dua salam mani ini ne bhahitie marasaeano we Laodikia; ne bhahitie mani Nimfa bhe umati marasaeano sumambaheano we lambuno. <sup>16</sup>Mada dabasaangkoomu suha aini, aesalo pakatue'omu ne umati we Laodikia dobasae'ao dua. Pedamo dua suha <sub>nebuhiku</sub> so umati we Laodikia, basae'omu dua bhe hintimiu. <sup>17</sup>Fohatoomu dua Arkipus, "Fotokaemo kahadhaa netahimamu weo ka'ondofaomu ne Ompu."

<sup>18</sup>Idi, Paulus apakatuangkoomu dua salam, abuhiane limaku wutoku. Koe molimpu'a kanau'omu ingka nandoo atitohongku. Sio-siomo napobhaiangkoomu kabarakatino Ompu.